

中國方志叢書·華中地方·第八九四號

據

清·朱慶夢等修，黃大承等纂
清同治十一年刊本

影印

江 西 省

新昌縣志

(七)

成文出版社有限公司印行

新昌縣志卷之二十四

藝文志三

傳

三世祖

諱

用中傳

鄒維連

祖用別

諱

用中字惟信號庸齋家於天寶鄉之合浦

生有奇相及長倜儻多知尤勤學問通經史元政日
非天下將亂乃棄經生章句學兵法得其大意性喜
任俠愛人禮士素善全鄉李立愛趙齊則錢汝梅結
爲兄弟時方國珍亂海上元之將帥不能討專務招

撫姑息養寇祖謂所善諸友曰時事可知矣吾儕雖
欲袖手聚歡可得乎丈夫擁厚貲稱富翁以資大力
負走無爲也豈若散爲緩急圖於是傾貲結客而里
中魁豪壯子弟益相親附矣及元至正辛卯天下果
亂劉福通徐壽輝輩各以紅巾爲號攻陷郡縣壬辰
壽輝裨將歐普祥陷袁州陶九陷瑞州民苦兵火衆
愈服祖先見咸曰平生覩惟信智勇出人今事迫矣
盍往問計圖自全祖曰草昧初熾瞻烏駭鹿孰無爭
王圖霸之心哉要以才德首出不嗜殺人爲真主余

觀諸賊俱無成必有高光其人者出應天命吾儕結寨守境以待之乃爲上計畧地攻城徼倖非分爲中計流離轉徙去鄉背井末計耳君請何擇衆曰上計便乃募壯士九百餘人歃血定盟推祖爲長與諸傑分守逍遙搖盪等寨各立渠帥使相統制祖以人衆不可無約束令於衆曰賊若犯東則西援犯西則東援來則把隘阻其前去則選銳尾其後毋令踰筠而北若等亦毋掠人子女玉帛違者罰無赦衆皆奉令不敢違癸巳張士誠據高郵僭號改元祖慮賊襲列

寨倉卒難援乃擇東北極峻之峯爲大寨以便瞭望
名曰古陽寇至舉烽登時卽知揮兵截殺祖旣捍賊
有備陶九據筠空城間出剽掠輒挫歸憤甚於是悉
兵北向直抵逍遙勢甚危祖曰賊今深入若不死救
屠亡齒寒生靈塗炭豈不辜負保障之志乎乃大饗
軍士夜走間道攀木緣崖以達逍遙賊猶未知漏盡
潛遣健卒約諸傑以鳴金爲號各寨鼓進遂與賊戰
自辰至午紅巾大敗追奔四十里由是軍聲大振自
筠以北皆安堵賊復潛掠石陂地方提舉胡某遣使

告急祖復領兵擊敗之提舉感德因以女娶其子而
以岡頭莊屋十八所爲嫁資卽今鄒姓各宅其基也
甲午祖乃卜居岡頭之盆形仍壁古陽分兵守要地
且耕且守賊終不敢窺戊戌壽輝別將陳友諒畧地
至瑞祖益戒嚴稍失機者斬以徇賊不能攻退走無
何友諒弑主壽輝僭號漢袁州守將普祥始貳於友
諒遣使授祖兵馬元帥祖嘉普祥知順逆遂與結納
是歲大祖高皇帝帥師伐漢至龍興祖知天命有歸
乃以事理曉普祥偕往迎駕納兵歸附高帝喜曰爾

其仍領所部歸寨簡鄉土余將取用爾戊申高帝登
極祖以奉命守寨未有詔取不敢朝辛亥洪武四年
帝遣宜春侯黃帝招祖祖遂拔寨赴京謁帝奉天門
帝曰爾等結寨山林爲公平爲私乎祖叩頭曰臣曩
遭時不祥賊兵蜂起與衆誓保鄉土苟延性命耳陰
謀異議無有也臣等意必死於鋒刃豈期復覩太平
天日乎帝喜除祖雄武衛管軍百戶撥守興化尋賜
勅命官校尉子孫世襲已而欽調福州左衛已又改
中衛歲歲領兵出海備倭倭寇遠遁不敢近閩若干

年閩人德焉洪武二十三年老疾乞骸骨帝賜寶鈔

淮子

諱

甯者襲職甯祖別

諱

曰宏海屢立戰功勅除

昭信校尉改爵偏橋衛祖因貤封昭信校尉管軍百
戶祖妣張氏封太安人越七傳而有孫廷尹字良臣
八傳而有孫喜學字可將俱以匹夫汗馬得世官皆
聞祖而興起者祖於武洪庚午五月初六日卒至今
鄉人猶頌保障功不衰

胡孝子傳

胡椿

今上御極之二年熊君紀令鹽上民胡舜夔孝狀熊

君遷去余代之當道檄余覈其牀乃屬耆老而廷按之如一口余實其狀報當道且爲傳俾後之秉筆者采焉夔固邑著姓子也父持邦母江氏夔兒時適隣姬予之柑弗啖袖而遺之父母人謂邦有陸郎矣長力學尤喜孝經常曰世之具羶薌美滋味者直犬馬親耳遂一意承懽無復功名念或謂之曰顯親揚名非孝乎古有絕裾而仕者子胡難以牲鼎易菽水耶謝曰夔有郭外之田足以供饘粥衣斑兒戲可以娛親顏古人且烏鳥陳情不一日換三公甯以彼易此

母父春秋高鷄鳴率婦具衣冠寢門外日進酒必召鄰叟若嫗之善父母者偕酒酣起舞或令子弟嬉於前父母疾衣帶不解湯藥必嘗夜則焚香祝曰夔有罪天疾夔父母願天已年以修父母毋父母以也父卒哀毀骨立俗必薦以浮屠屏不用旣葬廬墓淚於土近墓無乾者母老且病每籲天呼曰天不以夔之年修父請以修母倘多一夕報劬勞死且無恨五年而母卒哀禮兩盡一如居父喪葬復廬於墓時虎狼張甚鄉之人未午而門獨環墓二十餘里篋虎跡居

民交相語也胡郎之孝格虎矣羣誠其子孫以胡郎
爲法夔之叔持勉貧歲捐粟養之久而弗替且於隣
有不給者給之死不能棺者棺之凡吉凶一遵文公
家禮教四子若孫俱以儒術顯其於孝翁慈可謂兼
之矣椿曰余觀古之孝所爲集烏滅火者彼其精誠
所格捷於影響今夔以廬墓却虎卽其勞也然夔不
獨以孝稱諸凡澤鄉之骼濟叔之單行古之道懿節
種種要以孝先百行一孝而眾美積矣蓋聖賢之言
曰至孝通於神明又曰孝弟爲仁之本信哉

徐節婦傳

吳甘來

嘗上下古節義之林至於死事盡矣顧世無杵臼則程嬰不得生世無程嬰則杵臼亦無以死二者志節同歸成敗易面爲杵臼者難爲程嬰者則更難矣彼所謂生死無憾者也余叙次徐節婦事未嘗不悲其志而壯其烈也徐氏爲劉君應進妻歸未踰年而劉君卒是時徐年方十有八耳誓以身殉水漿俱絕者數日戚屬禁之而曰不可家人知其有身止以大義徐乃悟因拊膺痛曰幸而得男以偷息之身不絕趙

祀天之命也不然余懼其後死矣乃強飲食越五月而誕果得男鞠育痛楚顚擲嘗廢一飯屢置七積勞成疾幾不起遇善藥而甦兒長訓以大義今其孤已哀然鬢序嶄嶄見志嗟夫方其輾轉欲絕時一死外無可言者乃一息未忘而百年蒸嘗因以無恙此可下報宜孟卽欲爲公孫杵曰蓋不可得矣然其志則人也其濟不濟則非人也嗚呼誰爲之哉初劉君父名世母吳氏俱早世其大父方在堂髮皤然白徐以係婦代養問寢視膳疾敬而抑嘗之無異其子若孫

也以頽齡垂白下視此兩世者孑然垂盡未嘗不顧影而悲而膝下一煢煢婦奉滌灑一觸年年如故又未嘗不爲婦而強顏以慰也劉君有弟及婦至是亦繼沒遺孤者三又倚徐爲命徐拊摩備至一如所以拊已子者長爲之婚冠仍以其生產業完壁而歸之里中無不嗟歎余嘗詳其行述上下數世之間其家世不造如此以爲人生之變極矣而一緯婺踉蹌拮据其間上以使百年垂盡之老無桑榆遲暮之悲下以使兩室盈尺之孤無怙恃何依之痛劉氏數世死

者賴以獲瞑生者倚以爲命卽欲爲公孫杵臼固不可得然而公孫之志則盡矣嗟夫彼所謂生死無憾者也蓋嘗論之苟息無濟於生管仲有愧於死彼夫反面呼吸之間棄故君如敝屣齒骨未寒褰裳而往者里巷之士咸知而羞之若乃命之不猶時變勢極矢忠貞於無極遭隕墜於中道志以無他而事則不濟者比比皆是人爲之乎天爲之乎嗚呼抑又可哀也然則如之何如程嬰杵臼者亦庶乎其可也徐氏其幾之矣余一悲夫天下後世之爲管仲苟息也者

作徐節婦傳

胡松庵先生傳

葉向高

國家尊崇宋儒士以理學名世者指不勝屈然十九
縉紳先生順風而呼耳布衣之士惟陳剩夫王心齋
胡敬齋最著萬厯時廷議從祀之典進者三人而悠
悠之口向有遺論惟於敬齋則翕然無敢置喙豈非
居敬之學真得宋儒宗派而非如頓悟懸解者可以
虛詞借耶今新昌有胡松庵先生與敬齋俱江右布
衣其學俱以實踐躬修爲正的造次不苟沒後新昌

人士請於學使者祀之鄉賢葢雖未得與敬齋竝居
兩廡之列而已隱然無愧於學官之俎豆矣先生諱
用賓字其佐別號松庵生而廣穎豐頤氣度偉如初
就塾卽以聖賢自期許爲諸生構舉子業亦匠心命
意發明道術不作流俗綺語以求合於時縱屢困有
司不卹也久之而行誼愈孚其學問所得漸以顯融
爲世所尊信執贄而請問者屢恒滿戶外曰經師易
得人師難求欲求人師孰有如胡先生者而先生愈
益自好斤斤於義利之際常夜拾遺金候至明還其